

- राष्ट्रपति द्रौपदी मुर्मू अंतर्राष्ट्रीय दिव्यांगजन दिवस रे मौके राष्ट्रीय पुरस्कार दीना-कह्यो-दिव्यांगजन सारू बाधा मुक्त वातावरण मुहैया करावण माथे समाज रो खास ध्यान व्हेवणो चाहिजे।
- डूंगरपुर अर सलूमबर रा जिला कलेक्टर ई दिव्यांगजन राष्ट्रीय पुरस्कार ऊं नवाजी ज्या।
- प्रधानमंत्री नरेन्द्र मोदी तीन नुवा आपराधिक कानून देश ने सूंप्या-कह्यो-इण ऊं देश अंग्रेजां रा जमाना री सोच ऊं बाहर निकलेला।
- विधानसभा अध्यक्ष वासुदेव देवनानी विधानसभा उपचुनाव मांय जीत्या सात ई जणां ने विधायक ओहदा री शपथ दिरायी।

000

राष्ट्रपति द्रौपदी मुर्मू आज अंतर्राष्ट्रीय दिव्यांगजन दिवस रे मौके नई दिल्ली मांय 33 प्रतिशत अर बत्ती दिव्यांगता वाळा चोखो काम करण वाळ लोगां अर दिव्यांगजन री बेहतरी सारू काम करण वाळा संस्थानां ने राष्ट्रीय पुरस्कार दे र नवाजा। ई मौके वे कह्यो के दिव्यांगजन मांय उद्यमशीलता ने बधावो देवण, वां रा कौशल ने विकसित करण, काम-धंधा रा मौका मुहैया करावण समेत न्यारा-न्यारा जतन ऊं दिव्यांगजन रो अगुवाई करण रो बूतो बधेला।

राष्ट्रपति दिव्यांगजन री काम करण मांय आसानी ने बधावण मांय सुगम्य भारत अभियान री भूमिका रो ई जिकर कीनो। ई साल रा अंतर्राष्ट्रीय दिव्यांगजन दिवस रो मुद्दो है-समावेशी और टिकाऊ भविष्य के लिए दिव्यांगजनों के नेतृत्व को बढ़ावा देना। जळसा मांय प्रदेश रा ई दो जिला कलेक्टरां ने नवाजी ज्या। राष्ट्रपति डूंगरपुर रा जिला कलेक्टर अंकित कुमार सिंह ने दिव्यांगजन ने मजबूत बणावण री योजनावां ने असरदार तरीका ऊं लागू करण, दिव्यांगजन रा हक ऊं जुड्या कानून, वां री पिछाण रा कागज-यूडीआईडी अर दिव्यांगजन ने मजबूत बणावण री योजनावां लागू करण रा मामला मांय बेहतरीन काम सारू नवाजा। वे दिव्यांगजन रा कल्याण रा मिशन नो वन लेफ्ट बिहाइंड अभियान चलायो। राष्ट्रपति सलूमबर रा जिला कलेक्टर जसमीत सिंह संधू ने ई सुगम्य भारत अभियान कामयाबी सागे चलावण री श्रेणी मांय बेहतरीन जिला रो ईनाम दे र नवाजा। राज्य मांय ई ई मौके न्यारा-न्यारा कार्यक्रम राख्यी ज्या। राज्य स्तर रो जळसो जयपुर मांय राख्यी ज्यो, जिण मांय न्यारी-न्यारी श्रेणियां मांय चुण्यी ज्या विशेष योग्यजन अर विशेष योग्यजन सारू काम करण वाळा लोगां अर संस्थावां ने 10 हजार रुपया, मानपाना अर ईनाम दे र नवाजी ज्या। जळसा मांय बाड़मेर री जिला कलेक्टर टीना डाबी ने सामाजिक न्याय अर अधिकारिता मंत्री अविनाश गहलोत नवो बाड़मेर अभियान रा तैत दिव्यांगजन रा भला सारू करीजी कोशिसां बाबत नवाजा। सांचौर मांय राख्यी ज्या कार्यक्रम रे दौरान जिला कलेक्टर शक्ति सिंह राठौड़ पैरा-एथलीट ठाकराराम ने मान पानो दे र नवाजा।

सांचौर जिला रा ठाकराराम बेंगलुरु मांय व्ही 5वीं इंडियन ओपन पैरा-एथलेटिक्स इंटरनेशनल चैंपियनशिप 2023 री 100 मीटर, ट्रैक एंड फील्ड होड़ मांय कांसा रो तमगो जीत्यो हो। बारां मांय राख्यी ज्या सरकारी कार्यक्रम मांय दिव्यांगजन रो मान करी ज्यो। कार्यक्रम मांय बारां-अटरू रा विधायक राधेश्याम बैरवा कह्यो के दिव्यांगता शारीरिक या मानसिक अड़चन नी है, बल्कि खास बूतो है। सवाईमाधोपुर री विशेष स्कूलां मांय ई मौके दिव्यांग बच्चां सारू न्यारी-न्यारी होड़ां राख्यी ज्यी। भरतपुर मांय दिव्यांगजन

रिक्शा रैली निकाळी अर साफ-सफाई राखण रो संदेश दियो ज्यो। दिव्यांगजन सारु सरकार री न्यारी-न्यारी योजनावां री जाणकारी देवण रा मकसद ऊं संगोष्ठी राख्यी ज्यी। जालौर मांय ई दिव्यांगजन रैली निकाळी। झालावाड़ मांय दिव्यांग कैम्प, खेलकूद री होडां अर मान जळसो राख्यी ज्यो।

000

प्रधानमंत्री नरेन्द्र मोदी आज चंडीगढ़ मांय नुवा आपराधिक कानून देश ने सूंप्या। प्रधानमंत्री भारतीय न्याय संहिता लागू करण परां जनता ने शुभकामनावां दीनी। वे कह्यो के ओ सांचो सामाजिक न्याय है।

प्रधानमंत्री कह्यो के देश अंग्रेजां रा जमाना री सोच ऊं बाहर निकलेला। वे कह्यो के नुवा आपराधिक कानून लागू व्हेवणा वां आदर्शा ने पूरा करण री दिशा मांय ठोस कदम है, ज्यां री कल्पना म्हाणा संविधान मांय करीजी। ई मौके केंद्रीय गृह अर सहकारिता मंत्री अमित शाह कह्यो के तीन नुवा आपराधिक कानून तीन साल मांय देशभर मांय लागू व्हे जावेला।

000

सड़क परिवहन अर राजमार्ग मंत्री नितिन गडकरी ईंधन रा तौर ऊं पेट्रोल डीजल री ठौड़ इथेनॉल अर मेथेनॉल काम लेवण माथे जोर दीनो है। वे आज नई दिल्ली मांय सतत सड़क परिवहन रा बारा मांय राख्यी ज्या 18वां सम्मेलन मांय बोल रह्या हा। गडकरी कह्यो के भारत करीब 22 लाख करोड़ रुपया रो जीवाश्म ईंधन परदेश ऊं मंगावे है अर इण मांय कमी व्हेवण री सूरत मांय देश री माली व्यवस्था मजबूत बणेला। वे कह्यो के इथेनॉल सरीखा जैव ईंधन काम लेवण ऊं देश मांय प्रदूषण रो लेवल कम व्हेला अर खेती-बाड़ी ने बधावो मिलेला।

000

विधानसभा अध्यक्ष वासुदेव देवनानी विधानसभा उपचुनाव मांय चुण र आया सात विधायकां ने विधानसभा मांय वां रा कमरा मांय सदन री सदस्यता री शपथ दिरायी। सात ई विधायक हिंदी मांय शपथ लीनी। ई मौके विधानसभा अध्यक्ष शपथ लेवण वाळा सगळा नुवा विधायकां ने बधाई अर शुभकामनावां देता थकां कह्यो के विधायकां ने सदन री गौरवशाली परम्परा, गरिमा अर मर्यादा री पालना करणी चाहिजे। शांता अमृतलाल मीणा सलूबर ऊं, सुखवंत सिंह रामगढ़ ऊं, राजेंद्र भाम्बू झुंझुनू ऊं, अनिल कुमार कटारा चौरासी ऊं, रेवंतराम डांगा खीवसर ऊं, राजेंद्र गुर्जर देवली-उनियारा ऊं अर दीनदयाल दौसा विधानसभा हलका ऊं चुण्या जावण परां विधानसभा सदस्य री शपथ लीनी।

000

राज्यपाल हरिभाऊ बागडे विकास योजनावां अर कल्याण कार्याक्रमां रो फायदो आखिरी छोर ताई री जनता ताई पूगावण माथे जोर दीनो है। वे आज ब्यावर मांय जिला स्तर रा अहलकारां सागे मीटिंग मांय बोल रह्या हा। राज्यपाल केंद्र अर राज्य सरकार री योजनावां अर वंचित तबका री जनता रा सामाजिक अर माली उत्थान सारु चलाया जा रह्या कार्यक्रम मांय बारा मांय जाणकारी लीनी।

000

राजसमंद रा कुंभलगढ़ मांय चाल रह्यो तीन दिन रो कुंभलगढ़ महोत्सव आज पूरो व्हे रह्यो है। म्हाणा खबरनवीस बतायो के पर्यटन विभाग अर जिला प्रशासन री ओर ऊं राख्या जा रह्या ई महोत्सव मांय लोक कलाकारां सागे शास्त्रीय संगीत अर नाच-गाण रा कार्यक्रम राख्या जा रह्या है।

-----  
000

पाली जिला री नोवी पीएचसी ने बेहतर स्वास्थ्य सेवा देवण सारू राष्ट्रीय क्वालिटी एश्योरेंस सर्टिफिकेट सारू चुण्णी ज्यी है। सीएमएचओ डॉ. मारवाल बतायो के एनक्वास मांय चुण्णी जावण परां ई पीएचसी ने सरकार री ओर ऊं प्रोत्साहन राशि दी जावेला।

000

कोटपूतली-बहरोड़ जिला री पावटा पंचायत समिति मांय विमुक्त, घुमंतू अर अर्धघुमंतू समुदाय रा लोगां सारू लिए ब्लॉक स्तर रो सहायता शिविर लगायी ज्यो। शिविर मांय 50 ऊं बत्ता घुमंतू पिरवारां ऊं पहचान पत्र, जाति प्रमाण पत्र अर आधार कार्ड बणावण बाबत् अर्जियां लीरीजी। आं मांय ऊं पात्र पिरवारां ने पालनहार योजना रो फायदो दियो ज्यो अर मुफ्त स्वास्थ्य जांच शिविर लगायी ज्यो।

0000

ब्यावर जिला रा गांवाई हलकां मांय जिला प्रशासन आज रास्ता खोलो अभियान चलायो। 24 दिसंबर ताई चालण वाळा ई अभियान री सरुआत जिला कलेक्टर डॉ. महेंद्र खडगावत इण रा पोस्टर रो विमोचन कर र कीनी। जिला कलेक्टर बतायो के गेलां ऊं गैर-कानूनी कब्जत्रा हटावण रा ई अभियान रा तैत अढ़ाई हजार ऊं बत्ता गेला खुलवावणो तैय करी ज्यो है।

000

केकड़ी मांय आवण-जावण ऊं जुड़्या नियम नी मानण वाळां रे खिलाफ परिवहन विभाग करड़ी कार्रवाई कर रह्यो है। महकमो लारला महीना करीब साढे चार सौ वाहन मालिकां रा चालान काट र 16 लाख रुपया जुर्माना रा तौर ऊं वसूल कीनो। ई सागे ई 408 वाहनां रा रजिस्ट्रेशन निलंबित कर वां रे बेकार व्हेवण रो ऐलाण कर दियो ज्यो।

0000

गृह रक्षा संगठन रा 62वां स्थापना दिवस रा सिलसिला मांय आज गृह रक्षा प्रशिक्षण केन्द्र जयपुर ऊं मैराथन दौड़ राख्यी ज्यी। इण मांय पुलिस महानिरीक्षक, गृह रक्षा संदीप सिंह चौहान, अहलकारां, कर्मचारियां अर होमगार्ड स्वयंसेवकां रो हौंसलो बधायो। गृह रक्षा प्रशिक्षण केन्द्र जयपुर री कमाण्डेन्ट सुमन ढाका बतायो के साप्ताहिक कार्यक्रम रे दौरान खून दान शिविर, सांस्कृतिक कार्यक्रम, स्वच्छता अभियान अर जिला स्तर री परेड रा कार्यक्रम राख्या जावेला।

000

केंद्र सरकार साखां रा सरकारी मोल मांय करीब तीन गुना बधोतरी कीनी है। केन्द्रीय कृषि अर किसान कल्याण मंत्री शिवराज सिंह चौहान आज लोकसभा मांय एक पूरक सवाल रा जवाब मांय आ जाणकारी दीनी। वे कह्यो के एनडीए सरकार साखां उपजावण रा खर्चा माथे 50 फीसदी मुनाफो जोड़ र सरकारी मोल तैय कीनो है।

000